

Maisogon ug determinadong pakyasong ang bangis nga atake sa berdugong rehimen ni Duterte!

Ipahugot ang kalambigitan sa masa! Isulong ang gubat sa katawhan sa Isla sa mamugnaong paagi!

GIHIKYAD SA REHIMENG DUTERTE ANG sukaranan sa kusganon ug dinagkong mga atake batok sa mga rebolusyonaryong pwersa ug katawhan sa tibuok nasud ug sa Isla sa Negros. Gipahunong niini ang negosasyon sa kalinaw tali sa Government of the Republic of the Philippines (GRP) ug National Democratic Front of the Philippines (NDFP) pinaagi sa Proclamation 360 miadtong Nobyembre 2017 sam-

tang giproklamar ang Proclamation 374 nga nagdeklara nga mga teroristang organisasyon ang Communist Party of the Philippines (CPP) ug New People's Army (NPA) miadtong Disyembre 2017.

Sa Nobyembre 2018 giimposar ang Memorandum Order 32 sa Isla sa Negros ug sa Bikol ug Samar samtang nisunod ang pagpatuman sa Executive Order 70 nga nagtukod sa National Task

Force to End Local Communist Armed Conflict (NTF-ELCAC) miadtong Disyembre 2018 sa nasudnong ang-ang ug tukoron kini hangtud sa ang-ang barangay.

Hilabihan ka kusganon ug bangis ang kontra-rebolusyonaryong gira nga gilunsad sa rehimen Duterte pinaagi sa Joint Campaign Plan Kapanatagan nga nagpalihok sa tibuok pwersa sa Armed Forces of the Philippines



(AFP), Philippine National Police (PNP) ug mga tropang paramilitar niini. Gipangulohan ni Duterte, kuyog ang mga tag-as nga opisyal ug retiradong heneral sa AFP/PNP, ang NTF-ELCAC nga gibase sa whole of nation approach sa imperyalismong US aron mahuptan ug mapailawom sa iyang diktadurya ang tanang mga sibilyan nga ahensya sa gobyerno, mga pribadong sektor sa negosyo, institusyon ug mga organisasyon ug personalidad.

Tumong ni Duterte nga ihimulag ug pukanon ang mga rebolusyonaryong pwersa pinaagi sa todo-largada ug dinagkong operasyong militar ug itom nga propaganda nga hilabihang pagdaot sa CPP, NPA ug NDF. Diri sa Negros nakalatag ang masobra 14 nga batalyong pangkombat sa Philippine Army ug PNP lakip na ang mga pwersang paramilitar ug death squads alang sa maong katuyoan.

Sukad sa ikaduhang bahin

sa 2018, walay hunong ang mga kusganon nga operasyong militar sa kaaway sa Isla sa Negros. Gipugos ang mga lokal nga gobyerno (LGUs), gikan sa angang probinsya, munisipalidad ug barangay; mga nagkadaiyang ahensya ug organisasyon sa reaksyonaryong gobyerno; mga pribadong sektor sa negosyo; ug uban pang mga institusyon ug mga non-government organization nga ideklarang persona non grata ang mga rebolusyonaryong pwersa ug gipasalmot sa kampanya kontra-insurhensya.


Gikan 2019 hangtud sa kasamtangan, mikusog ang militarisasyon sa kabanikanhan sa paglunsad sa AFP/PNP sa dungan nga mga focused military operation (FMO) ug Retooled Community Support Program (RCSP) nga naggamit sa dili moubos sa usa ngadto sa duha ka batalyon sa usa ka takdang panahon. Ingon man, gi-atake ang kasyudaran pinaagi sa pag-reyde sa

mga opisina sa mga progresibong organisasyon ug pagdakop sa mga lider masa, pagred-tag sa mga militanteng organisasyon, personalidad ug mga oposisyon sa politika, ug pagpasang-at sa mga hinimo-himong kaso ug pagtanom og mga ebidensya.

Ang pinakagrabe nga hulagway sa pag-atake sa mga berdugong bata-bata sa rehimeng Duterte sa Isla sa Negros mao ang mga masaker sama sa Sagay 9, Oplan Sauron 1 ug 2 ug Oplan Branstark ug kuyanap nga mga ekstrahudisyal nga pagpamatay (EJK) sa mga personahe ug masa nga nakigbisog para sa i-lang demokratikong katungod ug interes taliwala sa pagpanglupig, pagpahimulos ug mga pagpangyatak sa tawhanong katungod sama sa nahitabo nilang Alexander Ceballos, Atty. Ben Ramos, Konsehal Bernardino



NOBYEMBRE 2021
ISPESYAL NGA ISYU



ANG *Paghimakas*

Nagapasalamat ang *Ang Paghimakas* sa mga kontribusyon agud mangin madinalag-on ang ini nga isyu. Sa pagpauswag sang aton *Ang Paghimakas*, ginapangabay sa tanan nga bumalasa nga padayon nga mag-amot sang mga balita, piktyur, istorya kag iban pa nga sinulat. Nagapangayo man kami sang inyo mga suhestyon kag komentaryo paano pa gid ini pauswagon.



angpaghimakas@yahoo.com



fb.com/negros.angpaghimakas



negrosrevportal.wordpress.com

“Toto” Pa-tigas ug Zara Alvarez.

Kadungan sa mga dinagkong pagpangatake sa kabanikanhan ang mga iskema sa pagpanglingla nga gipasiugdahan sa AFP/PNP ug mga Provincial Task Force-ELCAC. Gipahigayon ang mga “Dagyan ng Mamamayan,” “Serbisyo Caravan,” “People’s Day” ug uban pang susama nga mga malinglahong programa ug aktibidad gikan sa mga syudad sa Canlaon ug Guihulngan hangtud sa Zamboangita, Dauin, Siaton ug Sta. Catalina sa Negros Oriental. Gipahigayon usab ang pagkontra ug pagsabotahe sa mga aktibidad sa mga progresibong organisasyon parehas sa pagpahigayon sa AFP/PNP og mini nga “Peace Summit” atol sa paghandum sa Escalante Masaker sa mismong lugar nga giandam sa mga progresibong organisasyon miadtong Setyembre 20, 2019, diin nahimong kontrobersyal ang seremonya sa “pagsurender” sa 2,510 ka indibidwal nga gilingla ug gipugos sa Philippine Army nga mosurender isip mga sakop ug tigsuporta sa NPA.

Kaniadtong kumander pa sa 303rd Brigade si Benedict Arevalo, aktibo kini sa pagkampanya sa mga eskwelahan sa syudad sa Bacolod para sa pag-red-tag sa mga progresibong organisasyon aron ihimulag sila sa mga

estudyante ug akademya. Adunay pagpatawag og pulong-pulong sa mga Sangguniang Kabataan aron rekruton sila sa mga gisuportahan sa 303rd Brigade nga organisasyon ug pagkonbertir sa mga kooperatiba sa mga mag-uuma ug mamumu sa uma ngadto sa Masaligan (79th Infantry Battalion) Farmers Cooperative ug Fishers Association.

Sa katapusang tuig sa berdugong rehimen ni Duterte, midklarar si Maj. Gen. Arevalo, ang bag-ong kumander sa 3rd Infantry Division (3ID), nga tapuson na sa AFP ang insurhensya sa Isla sa Negros niini nga tuig hangtud sa Hunyo

2022. Ang kinatubuk-ang tumong sa kaaway mao ang paghimulag sa mga rebolusyonaryong pwersa gikan sa katawhan ug pagkahuman pukanon kini sa mahukmanong paagi.

Ekspektahan ang pinakagrabeng atake sa mga pwersa sa 3ID, 303rd Brigade ug 302nd Brigade sa Philippine Army, ingon man sa mga tropa sa PNP ubos sa Joint Task Force Negros, sa kabanikanhan ug bisan sa kasayuran. Pinakamaayong dugang ipataas sa rebolusyonaryong pwersa ang ilang kaisog, determinasyon ug militansya sa pakigharong niini nga tipo sa atake sa kumprehensibong paagi.



Pasismo ang timailhan sa kahuyang ug pagka-desperado sa estado taliwala sa usa ka sosyo-ekonomikong krisis nga gipagrabe sa pandemyang COVID-19

DAKO UG ESKANDALOSO ANG BADYET ug paggasto sa kontra-insurhensya nga kampanya sa rehimeng Duterte lakip na ang pagpamalit sa modernong armas ug uban pang kagamitang militar nga ang dakong bahin gikurakot na sa mga tag-as nga opisyal sa AFP/PNP. Mitibugsok ang ekonomiya tungod sa sosyo-ekonomikong krisis sa nagharing sistema nga gipagrabe sa pandemyang COVID-19 nga nabulit sa kuyanap nga korapsyon sa nagkadaiyang ahensya sa reaksyonaryong gobyerno. Ang rehimeng Duterte nagbarug nga tigpanalipod sa dunot nga reaksyonaryong sistemang alang-alang kolonyal ug alang-alang pyudal ug sa interes sa nagharing hut-ong sa dagkong komprador burgesya-agalong yutaan sa kaalaotan sa halapad nga masa sa katawhan lakip na ang mga tunga-tungang pwersa sa katilingban.

Target sa nagkadakong kayugot sa katawhan ang rehimen tungod samtang biktima ang katawhan sa pandemyang COVID-19, mga lockdown ug kwarantina nga kulang sa ayuda, gra-

beng kagutom ug kawad-on, ug pagkahanaw sa panginabuhian ug trabaho, ang mga dagkong opisyal militar ug mga burukrata sa mga ahensya sa gobyerno, pamilya ug mga kroni ni Duterte nalambigit sa halapad ug walay-ulaw nga mga kaso sa korapsyon nga nagpagrabe sa bangkarute nga kahimtangan sa ekonomiya ug pampublikong panudlanan.

Grabe ang krisis sa pinansya ug rekurso atubangan sa pandemyang COVID-19 apan walay nahatag ang rehimeng Duterte nga solusyon sa problema sa katawhan sa kuyanap nga kakabus, kagutom, kawala o kakulang sa trabaho ug pagkaguba sa panginabuhian tungod sa lockdown ug kwarantina nga giimposar sa militaristang rehimen.

Gibuhinan ang badyet nga gigahin alang sa edukasyon, panglawas ug uban pang serbisyo sosyal. Hilabihan ka kulang ang pundong gialokar alang sa pagkontra sa COVID-19 ug alang sa ayuda sa minilyong katawhang gigutom ug nawad-an sa panginabuhian tungod sa

COVID-19 nga pandemya. May mga bagyo pa sa 2020 ug niini lang 2021 nga hinungdan sa grabeng kadaut sa panginabuhian, kinabuhi, kabalayan ug uban pang imprastruktura sa katawhan nga nagdemanda sa ayuda taliwala sa higanteng badyet alang sa AFP/PNP ug kontra-insurhensya. Usa niini ang Barangay Development Program (BDP) sa NTF-ELCAC nga gitawag nga pork barrel sa militar.

Paspas nga midaghan ang mga katawhan nga nayugot sa mga lakang sa rehimen batok sa pandemyang COVID-19, kuyanap nga pagpamatay sa “gira kontra-droga,” pagpamatay sa mga abogado, magtutudlo, mga mag-uuma ug mga tunga-tungang pwersa nga kritikal sa mga kontra-katawhang palisiya sa pasistang rehimen, ug pagpangdakop ug red-tagging sa mga progresibo ug militanteng organisasyon. Hilabihan ka pasista ang rehimeng Duterte atubangan sa katawhang Pilipino apan itoy kini atubangan sa agresibong pag-okupar sa China sa Exclusive Economic Zone (EEZ) ug

.....  @npanegros



Ang rehimeng Duterte nagbarug nga tigpanalipod sa dunot nga reaksyonaryong sistemang alang-alang kolonyal ug alang-alang pyudal ug sa interes sa nagharing hut-ong sa dagkong komprador burgesya-agalong yutaan sa kaalaotan sa halapad nga masa sa katawhan lakip na ang mga tunga-tungang pwersa sa katilingban.



fb.com/apolinariogatmaitan.39



Extended Continental Shelf (ECS) sa Pilipinas sa West Philippine Sea.

Hinay-hinay nagkadako ang siak sa nagharing hut-ong tungod sa paboritismo ug kroniyismo sa nagharing rehimen. Adunay sikretong disgusto ang pipila ka retirado ug aktibong elemento sa han-ay sa AFP ug PNP kabahin sa kontrobersiya sa West Philippine Sea ug ang pagka-ito sa rehimen Duterte sa China. Nadungagan pa ang siak sa nagharing hut-ong samtang nagkaduol na ang nasudhong pini-liay sa 2022.

Gikasilagan sa masa ang mga pasistang binuhatan sa berdugong rehimen ni Duterte. Hinog na ang kahimtang sa pagpakusog sa pagbatok sa masa kon hustong mapukaw, ma-organisa ug mapangulohan ang ilang paglihok. Labaw'ng nahimulag sa halapad nga masa sa kabanikanhan ang kaaway tungod sa ilang mga pasistang krimen ug brutalidad. Nagsalig sila sa pagpanghulga, pagpanglingla ug uban pa.

Ang NPA isip sundalo sa katawhan andam sa mga dagkong kalisdanan ug sakripisyo sa pag-alagad sa katawhan

SA KINATIBUK-ANG SITWASYON KARON SA gira sa Isla sa Negros, subay sa balanse sa pwersa tali sa reaksyunaryo ug rebolusyonaryong pwersa, hilabihan ka imperyor ang mga rebolusyonaryong pwersa ug nag-atubang sa hilabihan ka superyor nga nag-atakung kaaway. Apan sa isa ka gitakdang panahon ug lugar mahimong makaangkon og superyoridad ang mga rebolusyonaryong pwersa ug mapuo ang huyang ug nahimulag nga bahin sa kaaway kung ang mao nga superyoridad diskubrehon, sabton ug gamiton.

Kini nga superyoridad gamay, limitado ug paspas kaayo mawala. Apan kung sakto kining magamit, hinay-hinay nga makatigom og kadaugan bisan unsa ka gamay ug limitado batok sa hilabihan ka dako ug kusgan nga kaaway nga adunay bentaha sa pagbansay, kadaghanan, armas ug lohistika ug uban pang rekursu. Kinahanglang aktibo nga diskobrehon ug puntingon sa mga Pulang manggugubat ang kahuyangan sa kaaway ug gamiton kini aron anam-anam silang dugmukon.

Ang NPA padayong nagtagamtam sa lawom ug halapad nga suporta sa masang mag-uuma tungod nagtabang kini sa ilang pakigbisog alang sa tinuod nga reporma sa yuta ug sa uban pa nilang pakigbisog batok sa tanang porma sa pagpahimulos ug pagpanglupig. Bisan nasinati ang mga seryosong kadaut tungod sa dinagko, kusganon ug tagdugay nga pag-atake sa kaaway nga pila ka pilo ang gidak-on ug gikusgon, kompyansado gihapon ang NPA nga mapangibabawan ang mga kalisdanan ug sakripisyo tungod makatarunganon ang gira nga gilunsad niini ug nag-alagad sa katawhan.

Kinahanglang ipataas ang paningkamot sa kuyanap nga pagpukaw, pag-organisa ug pagpalihok sa halapad nga masa; resolbahon ang mga kasaypanan, kahuyangan ug kakulangan; ug padayong isulong ang kuyanap ug sunson nga gerilyang pakiggubat nga nanukad sa nagkalapad ug nagkalawom nga baseng masa. Importante nga maayo ang mga Pulang manggugubat sa pagtuon sa mga leksyon gikan sa kasinatian sa rebolusyonaryong kalihokan sa Negros, walay-hunong nga ilhon ang kaaway, ug pahaiton ang pagsabot sa mga balaud sa gubat sa katawhan ug gerilyang pakiggubat sa kasamtangang yugto sa estratehikong dependensya.

Kinahanglang moutingkay sa mga natigom nga bahandianon nga kasinatian sa hataas nga panahon sa pakig-away sa kusgan ug gamhanan nga kaaway. Magtuon sa rebolusyonaryong teorya aron maayo kining maaplikar sa kongkretong kahimtang ug praktika. Hatagan sa taas nga importansya ang mga gimbut-an ug pagpatin-aw sa Partido nga napanahon nga gipagawas. Dili magpakampante apan kalma sa paghuna-huna; mainit ug militant apaan sistematisado sa rebolusyonaryo nga pagtrabaho.

Ang mga detatsment sa Citizen Armed Force Geographical

Unit (CAFGU) ug RCSP gigamit sa kaaway nga mga blokeyo aron ipiton ang mga yunit sa NPA samtang ang ilang yunit pangkombat nga naglunsad sa FMO mao ang modugmok niini. Himoong dili epektibo ang mga RCSP ug mga detatsment isip mga blockhouse sa ilang pagliyok sa mga pwersang gerilya pinaagi sa paghimo og kontra-ensirkulo. Kinahanglang ilunsad ang kontra-ensirkulo pinaagi sa komprehensibo ug magkatimbangay nga pagpasulong sa kalihukang masa sa armadong pakigbisog, rebolusyong agraryo ug pagtukod sa baseng masa ubos sa hugot ug epektibong pagpangulo sa mga komite sa Partido ug mga kumand sa NPA.

Kinahanglang makiggitgitanay sa kaaway ang mga rebolusyonaryong pwersa sa plano niini nga bungkagon ang baseng masa sa mga konsolidado ug relatibong konsolidadong erya. Mas mapalambo pa sa mga Pulang manggugubat ang pakipaggitgitanay sa kaaway pinaagi sa pagsusteni sa hugot nga kalambigitan sa masa ug pagpalagsik sa pagtukod sa rebolusyonaryong

kusog ug paglihok sa masa diha sa padayon nga pagpasulong sa mga kontra-pyudal ug kontra-pasista nga pakigbisog samtang gipalambo ang ilang direktang partisipasyon sa armadong pakigbisog. Ipahugot ang kalambigitan sa masa pinaagi sa linyang masa ug tukmang paagi sa pagpukaw, pag-organisa ug pagpalihok kanila. Maggambalay og depenidong plano sa pagrekluta, pagpadako ug pagbansay sa NPA sa hamubong panahon.

Sa Isla sa Negros, halapad ang kayutaan ug daghan ang katawhan. Ang mga lugar nga walay RCSP ug detatsment padayon nga naghulat sa NPA. Sakmiton ang panahon aron paspas nga matukod ang baseng masa niini nga mga lugar, bisan ang mga lugar nga adunay RCSP o detatsment dili nato pasagdan. Hinoon makiggitgitanay sa kaaway sa pag-organisa, pagpukaw ug pagpalihok sa katawhan sa maong mga lugar. Paningkamotan nga matukod pagbalik ang pulitikal nga panaghiusa sa mga lugar nga adunay RCSP ug detatsment.

Sa kinatibuk-an, bisan pa sa

gidak-on ug kusog sa AFP/PNP, daghan kini og kahuyangan nga bulnerable sa mga atritibo ug anihilatibong aksyong militar sa NPA. Ang mga yunit sa RCSP ug detatsment bulnerable sa atake sa NPA kon himulag kini sa ubang pwersa. Makaya kining i-override kung adunay maayong paniktik ug pag-andam sa lugar-awayan, adunay naandam nga superyor nga pwersa, mogamit sa surpresa, paspas nga pagatake ug adunay suportang masa.

Ang dagko nga kolum sa kaaway pag-abot sa mga interyor nga erya modispers ngadto sa platun o seksyon ang gidak-on, bulnerable sa anihilatibong aksyong militar sa konsentradong pwersa sa NPA. Mas daghan pa ang madiskobrehang bulnerabilidad sa kaaway kung maayo ang gimbuhatong paniktik.

Kinahanglan determinado ang NPA ug ipataas ang kaisog sa pakig-away ug panalipdan ang interes sa katawhan ug ang naabot nga mga kadaugan sa rebolusyon.

Mas mapalambo pa sa mga Pulang manggugubat ang pakipaggitgitanay sa kaaway pinaagi sa pagsusteni sa hugot nga kalambigitan sa masa ug pagpalagsik sa pagtukod sa rebolusyonaryong kusog ug paglihok sa masa diha sa padayon nga pagpasulong sa mga kontra-pyudal ug kontra-pasista nga pakigbisog samtang gipalambo ang ilang direktang partisipasyon sa armadong pakigbisog.



Ang Paghimakas Online

Ang rebolusyonaryong pwersa andam sa pag-atubang sa kusganon ug dagkong atake sa kaaway

ANDAM ANG REBOLUSYONARYONG PWERSA SA Isla sa Negros sa dugang pang mga kalisdanan ug sakripisyo. Dugang ipataas ang determinasyon ug kaisog nga tibuok-kusog nga subling pakyason ang plano sa berdugong rehimeng Duterte gamit ang 3ID, 303rd Brigade, 302nd Brigade, Scout Ranger Company, Civil Military Operations Battalion sa Philippine Army ug Special Action Force Battalion ug Regional Mobile Force Battalion sa PNP nga pukanon ang rebolusyonaryong kalihukan sa Isla sa dili pa mahuman ang iyang termino. Ilunsad ang kontra-kampanya batok sa dagko ug kusgang atake sa berdugong kaaway.

Nagkinahanglan sa kinatibuk-ang mobilisasyon sa mga yunit sa NPA sa mga larangan gerilya; ug mga yunit milisya, yunit depensa sa baryo ug mga organisadong masa sa mga konsolidado ug relatibong konsolidadong erya. Ang baseng masa sa mga sonang gerilya adunay papel, lakip na ang mga higala ug alyado sa rebolusyon, sa halapad nga pagbatok sa pasistang atake sa berdugong kaaway.

Hatagan og konsiderasyon ang dakong importansya sa kadaugan sa mga taktikal nga opensiba; pili-on ang mga bira nga magpatataw sa pangpulitika nga basehanan sa armadong pakigbisog.

Kinahanglang taas ang pleksibilidad sa mga Pulang manggugubat. Mahimong pleksible sa paggamit sa mga pormasyon para sa aksyong militar. Magtukod sa mga gagmay'ng separado nga yunit nga paspas makamaniobra ug makalusot-lusot sa tunga sa mga posisyon sa kaaway alang sa operasyong

pagharas ug uban pang at-ritibong aksyon aron mahatagan ang nangunang yunit sa oportunidad nga makapatuman og epektibo ug solidong batakang taktikal nga opensiba batok sa kaaway. Gikinahanglan ang mas taas nga mobilidad sa bisan unsa nga pagkampo. Kinahanglang kanunay naka-impake, ug minusan sa bug-at nga mga kagamitan ang gikampohan. Kinahanglang adunay maayo ug tin-aw nga sistema sa pagmaniobra sa mga indibidwal ug yunit panahon sa kalit nga atake sa kaaway.

Ang FMO ug RCSP sa AFP kayang pakyason sa mga yunit sa NPA. Ang kampanya sa mga batakang taktikal nga opensiba sa NPA nga makapuo sa kaaway ang pinaka-epektibong pamaagi sa pag-atubang sa mga FMO. Pinaagi sa tabang sa masa sa pagsunod sa lihok sa kaaway, pagpili sa paborableng tereyn, pagpamilyarisa sa mga ruta ug padron sa sulod-gawas sa kaaway, maayong paggamit sa mga command-detonated explosives ug saktong higayon nga kapoy na ang mga tropa sa kaaway sa pipila na ka adlaw nga operasyon, kaya silang hapakon og dakong kadaut sa NPA. Ikombina kini sa mga serye sa operasyong pagharas sa naglihok nga dakong tropa sa kaaway ug pag-atake sa huyang nga bahin niini.

Importante ang regular nga pagtasa sa kahimtang sa kaaway ug pagbasa sa ilang disenyo ug plano sa matag panahon, ug usab ang kahimtang sa kaugalingong pwersa—ang NPA, milisya, organisasyong masa ug baseng masa. Kinahanglang kini aron paspas nga mapunting ang mga problema ug kahuyangan para mapanahon kini nga ma-

sulbad.

Tagaan og igong edukasyon ang mga Pulang manggugubat kabahin sa mga gimbut-an ug disiplina sa NPA, proseso sa rebolusyonaryong hustisya, mahitungod sa Comprehensive Agreement on Respect of Human Rights and International Humanitarian Law (CARHRIHL) ug uban pang may kalabotan niini.

Ipataas ang disiplina sa pagpatuman sa mga regulasyong militar ug organisadong paglihok sa tanang panahon subay sa istruktura sa pormasyon ug kumand sa mga yunit sa NPA. Ipundar ang halapad ug paborableng wanang sa maniobra sa mga yunit sa Pulang manggugubat. Tukuron ang mga sikreto ug luwas nga ruta. Sigurohon ang kaluwasan sa mga yunit sa NPA pinaagi sa paggambalay sa mga tin-aw nga lagda aron malikayan ang mga depensibang aksyon. Palamboon ang sistema sa pagbase nga adunay taas nga konsiderasyon sa paglikay sa monitoring sa aso, suga sa gabii, signal tracking sa kaaway ug adunay kober o depensa batok sa mga drone, helikopter ug bomba.

Himoong buta ug bungol ang kaaway pinaagi sa pagpataas sa lebel sa kalihukang pagsikreto aron itago sa kaaway ang lihok ug plano sa NPA. Dako kini nga butang para dili mahatagan og ideya ang kaaway kung asa nila presisong gamiton ang ilang mga drone ug ilunsad ang ilang pag-atake.

Hugot nga huptan ang pagsikreto sa mga kompartmentalisa-do ug taktikal nga mga impormasyon. Pana-panahon nga tasahon ang presensya sa erya sa mga asset sa kaaway, mga

Barangay Intelligence Network ug uban pang lambat paniktik sa kaaway. Kontrolon ang mga dili maayo ug dili masaligang elemento nga dali lang mapalihok sa kaaway. Mag-amping sa mga dili masaligang elemento nga motumaw panahon sa kusganong operasyong militar. Maghimo sa mahukmanong lakang aron malimpyohan ang mga erya.

I-andam ang baseng masa sa pagpanalipod ug pagbatok sa kuyanap nga militarisasyon sa kabanikanhan. Usa ka yawi nga hisgutanan sa gubat sa katawhan kung giunsa pag-andam ug gikasa ang mga organisasyong masa ug baseng masa aron manalipod ug mobatuk. Hiusahon ang mga rebolusyonaryong pwersa sa lokalidad sa pagtuki sa Partido sa sitwasyong pam-

pulitika ug plano sa kaaway ug mga tahas nga angayang dunan subay sa nagtunhay'ng sitwasyong militar.

Himoon ang tin-aw nga plano ug mga partikular nga gimbuhaton sa baseng masa. Tukoron ang kwerpo sa depensa sa sulod sa mga organisasyong masa. Himong sentro sa pagpalihok ang mga sanga sa Partido ug yunit milisya. Iplatar ang ilang pormasyon takdo sa kahimtang (iskwad o tim) ug gimbuhaton. Ang tanang punting o markadong elemento sa han-ay sa masa nga posible mahimong target sa kaaway segurohon nga dili maigo sa operasyong militar sa kaaway pinaagi sa pagpasulod sa NPA o temporaryong ibalhin sa ubang lugar.

Magkasa og plano sa pag-

panalipod lakip ang pakigbisog kontra-militarisasyon, organisadong ebakwasyon ug uban pa. Segurohon nga adunay edukasyon ang masa sa CARHRIHL ug hisgutanan sa tawhanong katungod sa kinatibuk-an ug sa espesyal nga kursong masa sa gubat sa katawhan.

Ikasa ang plano sa pagpalapad ug rekoberi sa baseng masa sa konteksto sa dinagkong operasyon sa kaaway. Yawi niini ang paglunsad og malampuson nga kontra-pyudal nga pakigbisog. Pasunsonon, palapdon ug palagsikon ang gimbuhatong propaganda. Padayon nga hiusahon ang masa ug ipataas ang ilang kaamguhang pangpulitika batok sa kaaway ug ang ilang determinasyon sa pagrebolusyon. **AP**

